

四庫全書

集部

欽定四庫全書

東臆集卷六

宋 張擴 撰

制一

韋淵守昭慶軍節度使開府儀同三司平樂郡

王致仕制

勅富貴弗離其身天道著虧盈之戒筋力不以為禮聖  
經存告老之文眷予元舅之長深佩前賢之訓屢形引  
疾之悃敢稽從欲之章具官某誠信存心齋莊秉則謙

以自牧而鋤驕矜之色寬以有容而敦嫺睦之仁卓然  
肺腑之英服在公侯之列蟬貂被飾儀已視於上台茅  
土啟封爵復王於異姓久奉朝請蔚為國華顧暫染於  
微痼乃力祈於謝事朕念東朝慈儉為寶方憊外家車  
馬之奢而渭陽抑退自高頗慕古人忠孝之美勉徇由  
衷之懇以成知止之名尚資寢膳之調益介壽祺之永  
往祇渙渥母怠欽承

劉光世除太傅守和衆輔國功臣護國鎮安保

靜軍節度使揚國公致仕制

勅功成則身退知天道者以曲為全位高則禮隆遇功  
臣者慎終如始睠廼勲勞之舊有愆調護之宜遽形謝  
事之章宜舉褒賢之典具官某稟資英果勵節忠純妙  
算無遺每攻城而破的沉機不露常緩帶以臨戎頃扶  
國步之屯久總中權之重建羊祜撫循之策得崇大選  
練之方艱難百惟夷險一節屢受上賞式旌元勲屬銷  
多壘之鋒游享珍祠之祿方自娛於閒燕俄有爽於節

宣遂辭簪紱之榮欲遂林泉之適重違雅志申錫贊書  
其加帝傳之尊以厚家庭之寵往祇渙渥益介壽祺

知台州胡交修守端明殿學士左朝散大夫致  
仕制

勅人臣徇知止之誠既從其欲王者厚褒賢之典式榮  
其歸具官某早有能名屢膺器使偉哉濟時之論蔚然  
華國之文稱重儒林徧儀禁路頃以北門之舊載陞常  
伯之崇既倦直於承明乃分符於臨海遽觀剡牘遂欲

乞身用不盡其才朕深起慨然之歎官以華其老汝預有終焉之榮益慎節宣永綏壽考

敷文閣待制李易轉左朝散郎致仕制

勅賢者立身知止惟能不殆人君厚下從欲所以推仁具官某早以詞華登於法從曲臺柱史雅高博洽之能西掖東垣兼盡論思之益引疾而去曾未淹時遽形謝悃嘗冠諸儒刊正秘文肆以命汝豕亥魚魯可勝計乎徃究乃心亦以資汝之學

敷文閣待制陳公輔轉左朝請大夫致仕制

勅人臣狗知止之誠既從其欲王者厚褒賢之典式榮其歸具官某早以雄文冠乎多士屢膺推擇宴歷清華雅高諫省之繩愆進預春官之帥屬久安詞館未究兩猷遽觀奏牘之陳遂上乞身之請肆增厥秩以示異恩尚寶榮名永綏壽祉

徽猷閣待制蘇遲轉左中大夫致仕制

勅大夫引年之制著在禮經君子知止之仁能敦風俗

眷予次對之舊遽滙言歸之誠爰舉褒章以光晚節具  
官某天資渾厚家學深醇簡自朕心列於禁路迪忠嘉  
而彌厲更夷險而弗渝朕方厚奉祠之恩閔勞以事爾  
乃形引疾之請將老於家有嘉易退之風徒鬱貪賢之  
志俾陞崇秩用為爾崇尚勤藥石之功益介年齡之  
永

翟琮守利州觀察使致仕制

勅事君以忠既竭致身之義引疾謝事爰推從欲之仁



具官某稟志不回抱材甚武早殫衛社之勇克著干城之勲比外總於兵鈴方訓齊於軍列遽形奏牘謂染沉疴宜頒申命之榮俾遂言歸之適益親藥石以介壽康

內侍張興轉歸吏部守武功大夫致仕制

勅具官某內侍之臣祇朕左右以病謝事宜厚其歸以爾抑畏小心恪恭盡禮閱歲寢久積譽彌休遽形引疾之詞宜舉閔勞之典俾還銓部易畀華資服我恩榮欽茲寵邁

王鑑守武功大夫遙郡團練使致仕制

勅具官某內侍之臣祇朕左右疾弗任事亦聽其歸爾  
以忠勤服職官省歲月寢久靖共弗渝言念筋骸之衰  
有須藥石之助俾還銓部易畀華資往休于家尚寶餘  
寵

昭州文學王浹父年九十封右承務郎致仕制  
勅具官某間者宗祀禮成大賚四海期頤之人亦霑慶  
澤爾年高鄉閭子在仕版命以京秩之職以為爾榮

恩州文學李天祐父諷年九十七特封右承武  
郎致仕制

勅具官某父某間者宗祀禮成大賚四海期頤之人亦  
霑慶澤以爾齒高鄉閭子在仕版命以京秩以為爾榮  
林洞年一百二歲特補右迪功郎致仕制

勅具官某間者宗祀禮成霑澤四方期頤之人亦霑慶  
賚今有司以爾姓名來上肆命以官以示吾優老之意  
爾其表率鄉里敦勸孝悌以明朕恩不虛授也

方海水年一百七歲特補右迪功郎致仕制

勅某人間者宗祀禮成霑澤四方期頤之人亦霑慶賚  
今有司以爾姓名來上肆命以官以示吾優老之意往  
服渙恩益綏爾壽

蘭整守平海軍承宣使充兩浙東路馬步軍副  
都總管致仕制

勅事君以忠既竭致身之義引疾謝事爰推從欲之仁  
眷予虎臣用頒渙渥具官某早以藝勇冠于戎行御衆

有方允著綏懷之畧臨機以果屢收斬獲之勲比參總  
於戎昭益播名於淝右遽上言歸之請有嘉知止之風  
申錫贊書式彰晚節其往綏於壽祉以永保於恩休

關師古守侍衛親軍馬軍都虞候雄武軍承宣  
使致仕制

勅衛上以忠既盡為臣之義乞身而退盍推從欲之仁  
具官某結髮臨戎執戈就列應機料敵推明果之兼資  
御衆行師得寬嚴之相濟方倚訓齊之政遽形引疾之

章言念其勞勉從所請宜益勤於藥石庶永保於壽祺  
曹勛除容州觀察使充奉使大金國報謝副使

制

勅朕慎擇庸使修好殊鄰必得一時通敏之材遠達兩  
國協和之意具官某早通文藝詳練朝儀事不辭難言  
皆詣理比奉軍前之聘有嘉復命之詞載因爾能往將  
朕指宜有渙渥以示寵嘉其擢正於廉車用增華於使  
節益思自勵期稱茂恩

邢孝揚除保信軍承宣使充奉使大金國報謝  
副使制

勅朕竇親仁善鄰之圖講休兵息民之計遴簡忠信之  
士往修聘好之誠爰得其人俾副茲選庸加渙渥申錫  
贊書具官某裋身甚恭率履無玷早服詩書之訓嘗陪  
英傑之游文雅雍容舉獨高於肺腑威儀戒慎職久屬  
於橐鞬用疇專對之能式介皇華之遣其躡陞於留務  
以增重於使華益勵爾為期稱朕指

士勗磨勘轉遙郡防禦使制

勅具官某朕循列聖舊制宗室環衛陞遷之法待以十年之淹豈朝請之暇謹度由禮者久而後見歟以爾內和外恭樂於為善夙夜匪懈見謂老成俾進陟於兵防用增華於使範往祇渙渥益勵操修

韓誠轉武顯大夫遙郡防禦使制

勅具官某禮隆宮掖澤被嫺親爾有葭莩宜同其慶肆頒書命擢領兵防是為異恩益思報塞



士劇磨勘轉正任防禦使制

勅朕法先王睦族之仁愛由親始循列聖限年之制官  
以叙遷具官某存心惟誠樂善無倦閱歲寢久積譽彌  
休屬會課於有司應陞華於崇秩擢正兵防之任式增  
維翰之彊往祇恩榮益勵志恪

范塤除成都府路轉運副使制

勅具官某朕惟西蜀之區號稱沃野財賦所入不減中  
州異時軍興饋餉尤急今戢戈之始民力漸裕將漕之

臣是必取閱試之久才望素孚者為之以爾智適事幾  
學通治體聳一時之風采見上世之典型屢奉使華周  
旋蜀道顧民間之利病已胸次之灼知往究爾長即觀  
成効

張宇除直秘閣福建路轉運副使制

勅具官某朕惟國家之政財用為先顧一時調度之煩  
賴諸路轉輸之助以爾學通世務材應時須出揚使節  
之華入著郎闈之譽靖共自守久知爾休其往按於元

閩以宣勞於將漕寓直中秘式寵其行往服渙恩母忘  
報稱

趙伯牛除直秘閣福建路轉運副使制

勅具官某朕臨遣膚使親諭德意慎用名器未嘗假人  
故將漕諸路必求心計之良而延閣華資亦閱其人而  
後授也以爾資性敏明吏能彊濟屢將朕指蔚有能稱  
還對便朝有嘉詳練往按七閩之遠仍兼寓直之榮式  
寵其行益圖後効

蔣璨除淮南東路轉運副使制

勅具官某朕圖回大業國用為先故於將漕之臣尤慎  
推擇責新進之吏不若倚諸老成求經遠之功不若得  
諸已試以爾學術精審吏能敏彊深識利源之歸益聞  
上世之訓周旋數路綽有能名朕惟長淮以東財賦所  
聚倘經理粗得其要領則事力豈減於平時往勵爾為  
以究今譽

李椿年除直顯謨閣兩浙路轉運副使制

勅具官某朕維士大夫有能秉德自信不惑浮議徇公  
減私事無辭難慨然有志於功名之會則朕所敦獎要  
官劇職舉而任之何中外之間哉以爾儒學登科文藝  
蓋衆深疾虛名之無補欲資實用以濟時戢吏愛民始  
於治縣抑彊扶弱久而益堅朕念艱難以來財用最急  
將漕之職尤慎其人矧惟二浙之富饒實乃東南之根  
本肆以命汝人皆謂宜輟從宰掾之聯寵以西清之直  
往貳使事宜究乃心古人所謂歛弗及民而用度足者

不於汝責而誰責也

張叔獻除兩浙路轉運副使制

勅具官某朕圖回中興財賦莫急內助大農外實邊備  
漕計是賴而兩浙視他路尤號富饒實東南根本也膺  
是寄者可非其人哉以爾敏悟天資銳於立事忠義世  
濟灼知事君其必能為朕抉剔蠹弊檢柅吏姦使利源  
無奪於兼并催科不困於追擾上下既寬國用自足肆  
以命汝誰曰不宜乃若褰帷問俗激濁揚清屢試已孚

奚侯多訓

李文會除殿中侍御史制

勅具官某朕慎擇御史糾正朝綱副端之聯實亞承離  
任一時之言責肅在位之官邪儻非直諒之人孰在簡  
求之列以爾性資靜重器局方嚴學不務於多岐論必  
遵於古誼擢在烏府望實彌孚其陞峻於殿中以同符  
於公議往祗厥職益勵乃忠

蔣挺起復右武大夫忠州刺史制

勅衰經終喪雖存彛制金革無辟盖屬權宜具官某久  
親戎行屢著勞績以身徇國難顧爾私其起泣於故官  
庶移忠而自效

劉勝換給左武大夫達州刺史制

勅朕惟關陝異時軍聲未振亡將叛義首亂熙河顧一  
時勦除之功緊諸校忠憤之力具官某剛烈自許威名  
遠聞絕藝冠於三軍雋功收於百戰曾吞噬虎狼之足  
畏豈誅鋤蛇豕之為難官繇叙陞國有信賞賜賁真命



尚務欽承

士赫磨勘轉送郡刺史制

勅具官某以爾竭事上之恭知為善之樂操修無怠譽處有休用申錫於贊書俾遙分于郡寄往祇朕命益懋爾為

詹大方除監察御史制

勅具官某朕廣聰明之用旁資耳目之官總核名實之嚴專責紀綱之寄維時御史咸取正人以爾持心謙謙

率履坦坦內懷仁者之勇外粹君子之容敬厯茲深靖  
共益勵其參三院之列往察六官之聯毋負朕知以堅  
爾守

游操除監察御史制

勅具官某

上詞同

以爾精白不渝剛方無撓推一時之後

又見舊學之典型俾刊秘文益著令聞其參三院之列  
往察六官之聯毋負朕知以堅爾守

何若除監察御史制

勅具官某朕深懲官邪能害政事衆建御史以贊臺綱  
儻非直諒之才豈在東求之列以爾學深而博氣勁以  
直進陪英俊之游服在校讎之選見聞日富議論自深  
其陞烏府之聯以肅外朝之治勉行爾志無負朕知

黃達如除監察御史制

勅具官某朕衆建御史維持紀綱惟時六察之聯實參  
三院之列孰在簡拔必資俊明以爾學問精醇氣節剛  
勁雖回翔州縣之久實深知治體之歸來自遠方揚于

便殿詳觀奏對有契朕心嘉其議論之公宜膺耳目之  
寄往務舉職無負朕知

李澗除監察御史制

勅具官某朕與二三大臣日論人材凡授受之初必關  
進擬乃若御史府之屬則命由中出顧豈爾私哉蓋綱  
紀之地耳目所寄任之專而責重故也孰在此選其惟  
吉人以爾問學之純操履之固不自表襮豈求聞知方  
虛六察之員儀圖一德之彥無以易汝亟務欽承

李貴轉右武大夫福建路兵馬鈐轄制

勅具官某材畧沉雄性資英果屢奮摧鋒之勇每高橫  
禦之功嘉其衛社之忠宜厚錄勞之典視秩上閤總戎  
七閩益勵爾為式圖報稱

凌哲除太常博士制

勅具官某品式章程法也文為制度禮也治世之具二  
者當相須焉學士大夫惟能議法不阿則於禮意過半  
矣以爾嘗為勅令之屬持論剛方傳以古誼故命爾充

太常博士之選夫知朕所以用汝之意則綿絕一時庸  
有不當者哉

劉嶸除太常博士制

勅具官某朕當禮文殘闕之餘舉一時綿絕之制參酌  
今古實資諸儒以爾穎悟絕人博聞彊記憶經引誼補  
助居多就陞博士之聯以贊容臺之典往服朕命益殫  
乃心

關注除太學正制

勅具官某朕偃草修文恢復庠序肆求髦彥糾正諸生  
以爾學約詞華見稱流輩必能為朕講求舊典作新斯  
文使士如平時則汝職舉矣

李公謹轉太史局中官正制

勅具官某間者慈寧回鑾中外稱慶爾於迎奉亦預有  
勞增秩示恩益共乃職

張柄朱斐並除大理少卿制

勅具官某等大理設貳蓋古廷尉之選也今列而為二

斷刑以平反雪冤滯為職治獄以聽訟獎有罪為能責  
任雖殊要之疏通忠厚者乃克為之以爾柄持議甚恕  
疾患文之拘以爾斐東彛有常厲靜者之操並列秋官  
之屬久揚省戶之休申錫綸言往釐寺事其帥厥屬各  
殫乃心

米友仁除將作監制

勅具官某朕肇新庶士中儆百工惟時大匠之聯必擇  
多才之彥以爾風猷敏劭智術疏通外揚使節之華內



藹節閹之譽擢長營繕實因爾能帥屬惟勤尚圖報稱  
知臨安府王喚除敷文閣直學士制

勅朕惟內閣藏列聖之訓而學士儲一時之英倘非其  
人不在茲選若時輦轂之寄咸推始行之優申錫綸言  
式昭寵數具官某精明蓋衆敏悟見幾濟劇揆繁壯百  
為之興舉摘奸發伏剋積弊以無留典茲浩穰之區允  
資彈壓之政存更時序備著賢勞財用不匱則深知裕  
民之方囹圄屢空則灼見省刑之術適申講會期之禮

將恢宏廣殿之規誰如汝能悉稱朕指方工徒之經始  
百堵皆興連輪奐之落成四方來賀嘉乃殊績用賁徽  
章陞峻西清之聯增重天府之任往服休命益殫乃心

余應求除福建路轉運副使鄭僑年除浙西提  
舉茶鹽制

勅具官某等朕惟國家之政財用為先輓粟飛芻實資  
於轉漕摘山煮海尤貴於阜通惟使者之得人則事功  
之自濟以爾應求學有根柢見於為政之方以爾僑年

風力敏彊克成濟美之譽其並持於使節以分按於外臺已試之能益思懋勉

張匪除太府少卿總領湖廣京西財賦制

勅九寺之貳品秩惟高外府尤號劇繁委任必先材譔取諸已試茲謂得人以爾心術疏通風猷敏劭中外踐歷詳練有聞錯節盤根迎刃輒解朕顧瞻鄂渚久屯重兵饋餉之饒實資數路領畧大要莫如汝宜其陞少列之華往重上流之寄財裕食足則予汝嘉

王次翁除資政殿學士宮觀制

勅進而陳力大臣肩衛上之忠退以遂私人主舉閔勞  
之典眷予近弼祈解繁機申錫恩章式昭禮遇具官某  
問學該洽襟懷粹夷排却紛華務清心而寡欲探討理  
亂期尊主以庇民晚登禁塗洊掌風憲深嫉官邪之敗  
力扶國是之歸遂膺側席之求入佐秉鈞之任坐閱四  
載實勤百為比修報於鄰邦方借賢於政路壯爾出疆  
之決不憚一行逮茲返命之初遽觀屢請洞察由衷之

惇宜推從欲之仁秘殿隆名真祠厚祿併彰異數庸示眷懷尚殫體國之心罔廢告猷之助

鄭億年除資政殿大學士提舉在外宮觀制

勅朕登崇峻良左右自近不累以事庶屢聞於謹言乃迫爾私謂不遑於將母念東朝方喜於就養豈邇臣可闕於承顏爰頒殊恩載錫休命具官某議論辯博詞章菁華行蹈中庸而抗之以高明學富聞見而守之以卓約早被先朝之眷久儀禁路之華比從琳館之優游俾

侍經帷之密勿方萬幾兢業之際補助居多亦平時人物之英典型猶在重惜其去有慨予懷峻秘殿學士之隆名視二府大臣之異數蔽自朕志式副僉諧噫朝廷孰尊每資有德之在列王室未遠毋忘我后之告猷其竭爾忠奚俟多訓

知泉州富直柔落賓政殿學士制

勅朕仁愛黎元矜愍庶獄每戒州縣必惟三尺之循懼差毫釐或起一夫之悔豈意用刑之誤成吾舊弼之愆

具官某早被簡知寢登嚴近備更夷險多歷歲時比從  
祠館之淹再畀侯藩之重宜祇朕寶慈之訓以成而共  
理之良乃於重囚曾不關意意繇玩習養成於平日致  
紛紜莫救於臨時傳聞之初疑駭相半雖從坐本焉非  
首情或可矜然死者遂不復生咎將誰執其鑄秘殿之  
職以申司寇之刑服我寬恩無忘內省

陳鵬飛揚邦弼並除太學博士制

勅具官某等朕惟承平之際士有師友文章深醇足以

風動四方表倡後進越自艱難學者失職氣格卑弱頓乖故步今朕恢復成均設博士之員而爾等咸以詞藝有聲場屋擢在甲科宜膺首選其必能為作新斯文以振一時之盛也尚往欽哉

王賞兼侍講制

勅聖賢立言若兩儀之高厚典籍所載待諸儒而發明朕博觀羣書精究奧旨乃延鴻碩庶助緝熙具官某以疏通之資負該洽之學言必詣理豈膠章句之傳問無



不知深慙口耳之習宜申頒於書命俾勸講於露門進陪羣英雍容在列探至道之蹟而形於議論爾所優為資古訓之獲以裨予聰明朕方虛佇往祇厥次益勵爾猷

程敦厚兼侍講制

勅具官某王人建事必求多聞上智愈明盖由就學朕廣覽載籍執古御今旁招鴻碩之英以善緝熙之助取諸近列申錫綸言以爾博通羣書推重多士智識敏悟

見聖賢之門牆詞章環竒超筆墨之畦徑比自南宮之  
選擢陞柱史之華閱日尚新厥聞彌著是用進陪俊乂  
勸講金華其陳有補之言勿負平生之蘊

羅汝楫魚侍講制

勅賢王好善而忘勢蓋輸樂取之誠上智就學而愈明  
必務多聞之益是資鴻博式副詳延具官某秉心不回  
養氣至大充真積力久之美所造者深當言聽計從之  
時為利則博擅茲儒術之富適應天人之求宜自諫坡

入陪經幄鑑古而知興替朕方慕文皇之勤告后而善謀猷汝宜勵君陳之志展盡底蘊無慚古人

梁揚祖除寶文閣學士宮觀制

勅列聖有訓藏諸內閣之嚴聯職其間尤高學士之選朕構此舉不以假人眷時老成用頒明命具官某風猷敏劬智術疏通早似續於家聲屢肅將於使指揆繁濟劇事無肯綮之難發伏撫姦政多神明之譽頃繇帥閭入覲闕庭擢居武部之聯仍峻貳卿之列方觀治最遽

爽節宣是用寵以隆名必增祿之珍館朕念舊恩於攀  
附如汝豈忘爾圖後効於論思有猷則告

皇叔士昭磨勘轉遥郡團練使制

勅具官某朕法先王睦族之仁愛由親始循本朝限年  
之制官以叙遷以爾塞淵秉心溫恭允德入奉朝請盡  
寅畏之誠退無私交謹委蛇之行閱歲寢久會課應遷  
其寵陟於兵團以增華於使範益殫夙夜用稱恩休

武功大夫榮州團練使潘長卿落階官制

勅朕敦睦嫺之義厚戚畹之恩惟吳國之賢姬實秦陵  
之愛女宜舉異數以畀諸甥具官某律身無疵率履不  
越靖共在位溫清奉親有嘉肺腑之良俾正兵團之任  
祇予休命慰爾母心

武功大夫惠州團練使潘粹卿落階官制

勅

同上詞

具官某秉心甚誠樂善無倦詩書早習法度

自循有嘉肺腑之良俾正兵團之任祇予休命慰爾母

心

宗室士周轉遙郡團練使制

勅具官某朕疏親親之恩以睦九族念亡圖存亦遵祖宗之訓以爾溫恭好善肅括提身承父之休流光益遠宜頒進秩之賞以旌是似之賢益究爾心期稱朕命

麻世堅轉遙郡團練使制

勅執銳披堅莫先破敵第功行賞貴不踰時豈伊汗馬之勞猶畧司勲之典具官某威名蓋衆藝勇絕人時血戰於淮西尤身先於將士宜頒申命以錫前功俾遙領

於兵團尚勉圖于報効

何麒除宗正少卿制

勅具官某朕睦族屬以敦同姓之愛蕃本支以資維城之彊惟時司宗實典厥職孰膺推擇必以英髦以爾貫通古今嫻習憲度高明自其天性宏麗見於詞章寔敷厯於外臺既稔聞於治行采諸僉論寘彼周行申錫綸言之公進班卿列之峻蓋朕方修天保內治之政宗盟為先而爾必迪麟趾信厚之風王化則劭往帥厥屬毋

怠其為

王子澄除大理司直制

勅具官某大理人命所繫蓋自卿少而下至於僚屬品秩雖殊其責均也以爾秉心甚厚居官有聞俾應司直之聯庶獲持平之譽往祇朕訓益究乃心

李翼之除大理司直制

勅具官某明王建官循名責實大理設屬職在詳獻而以直名官則其義見矣以爾秉心近厚更事惟詳得之



僉諧舉以命汝夫三尺之法持平如衡事有撓曲爾其  
往直之以稱朕總核之意

章燾大理司直制

勅具官某

上詞同

或猶懼撓曲則司直之官存焉以爾持

心甚平敏於從政故命汝為之汝能知名官之義則職  
舉矣

劉子羽復徽猷閣待制制

勅朕慎用名器以叙羣臣敦勸事功而行信賞矧乃甘

泉之舊分子外屏之憂宜渙恩章以旌治最具官某美  
繇世濟材應時須達應變之方藹剴煩之譽自墮華於  
侍從每茂著於猷為比以丹陽起之散地適屆防秋之  
候允資御衆之良曾未淹時亟聞報政方列戍營屯之  
密捍防各得其宜而流民襁負而來安集不勞而辦其  
復西清之次對以重北固之長城益懋爾能期稱朕命  
施垌除敷文閣待制與郡制

勅入而持橐綴甘泉侍從之聯出則剖符當列郡于蕃

之寄勢雖分於內外任皆取於賢能眷時耆英申錫書  
命具官某靖共不撓惇悃無華早被師儒之聯洊膺遺  
補之選議曲臺之禮援據甚詳贊宗伯之儀情文兼茂  
其陞次對之列式寵朱輜之行母金玉其音遂自同於  
遠外告謀猷于后尚曰倚於老成

史愿除敷文閣待制制

勅事君不擇事而安允資於忠力有功而見知則說宜  
厚於恩章具官某智術疏通吏能敏健頃預軍諮之列

每輸籌畫之良備著勤勞見稱詳練屬重湖之寇未殄  
奉樞府之檄以行果平蠭蟻之屯盡復農桑之業有嘉  
茂績爰錫贊書惟次對之邇聯實侍臣之高選往欽朕  
命益殫爾忠

頓渙大理評事制

勅具官某明主用人因任而已與其彊所不能不若取  
諸已試之為愈也況獄事乎以爾詳審精明嘗為屬於  
棘寺惜其秩滿而去俾踐舊官爾其守職如初朕何憂

刑罰之失

孫敏修吳求並除大理評事制

勅具官某等大理人命所繫視他寺不獨官倍也雖評  
刑之屬亦必其法令素習乃以充選爾等持心忠厚咸  
以才聞爰錫贊書俾踐厥職夫舉三尺律以從事惟不  
撓不欺則於詳讞庶幾焉尚勉之哉

欽定四庫全書

集部  
東窓集卷八

詳校官庶吉士<sub>臣</sub>翁樹培

侍讀臣孫球覆勘

謄錄監生<sub>臣</sub>卞爾巖

欽定四庫全書

東臆集卷七

宋 張擴 撰

制二

常州武進縣嘉山善利廟龍封二字侯制

勅朕惟龍神變化不測潛躍以時出雲山川施澤萬物  
功利既溥爵秩宜頒今嘉山之祠靈狀顯著用寵加于  
命綍以進列于通侯祇服朕恩永綏爾祀

筠州利貺廟神封忠顯靈應侯制

勅惟爾神生蘊忠義捍蔽一方歿而不忘斯民永賴屬  
時艱棘草竊縱橫潛却妖氛具有影響申頌顯號以表  
威靈益侈朕恩式昌爾祀

邛州真濟廟神封昭應侯制

勅旱乾水溢非人力之能為祈禳禱祠或神休之可格  
惟神宅于幽閭奔走一方雨暘不愆年穀屢稔覽有司  
之奏牘嘉顯應之不誣用錫侯封以昭靈貺

淑國夫人李氏陞添四字封柔和恭順制



勅朕肇正長秋之位化基二南肆推內職之勤慶均諸  
婦具官某氏早以柔惠入預選掄久備掖庭之聯每殫  
夙夜之助逮維莘之作合尤庀事以宣勞申錫贊書式  
昭異數增賁令名之寵庸厚小君之榮往務欽承益圖  
報稱

南昌郡夫人李氏轉國夫人制

勅宮闈內嚴惟恪恭則行彌顯國典有序惟褒進則名  
益隆肆頒命綍之華以勸掖庭之舊具官某氏柔嘉秉

質溫惠持身早殫夙夜之勤備閱歲時之久可無異數  
以寵其勞錫號小君已渙筭珎之飾易封大國益新湯  
沐之恩朕命惟休永綏爾祉

宮正吳氏封郡夫人制

勅朕誕揚寶冊登建長秋凡一時容典之華實衆婦忠  
勤之助具官某氏早以淑質選自良家擢居尹正之聯  
夙著恪恭之譽屬椒房之儷極帥內職以宣勞申錫贊  
書式昭異數其陟小君之秩仍疏名郡之封往服恩榮

毋忘欽慎

楊愿除起居舍人制

勅具官某柱史載筆君舉必書豈獨記一時言動之詳  
蓋將示萬世是非之實膺是選者亶惟其人以爾問學  
淵源詞章敏妙上庠校藝每冠羣英潛府服勤嘗從初  
載望聳烏臺之勁特譽高薇省之彌綸爰錫贊書蔽自  
朕志其入侍丹墀之近以進參西掖之華益懋猷為嗣  
有褒陟

程敦厚除起居舍人制

勅具官某

上詞同

以爾天資高明詞采英發瀛洲學士

獵四庫之菁華南宮舍人妙一時之章奏宜膺遴東入  
選近班往思載筆之公以盡守官之義

孟思恭轉閣門宣贊舍人制

勅具官某上閤邃嚴為之屬者得以職事周旋殿中其  
選高矣以爾聯姻肺腑祇事王庭雅善朝儀見稱詳練  
就陞賓贊之職用頒申命之榮益務恪勤以圖報稱

吳蓋吳世昌王衍之潘邵張說並轉閣門宣贊  
舍人制

勅具官某等禮隆宮掖澤被私門爾以近親宜膺寵渥  
擢陞賓贊之列用侈一時之恩

陳靖轉閣門宣贊舍人制

勅具官某贊義上閣實號華資非有殊勞豈以輕授爾  
祇事殿陛屢閱歲時夙夜在公見稱詳練就陞厥次用  
旌爾勤

韋彥章補忠翊郎閤門祇候制

勅具官某朕躬天下之養格東朝之歡凡爾近親悉加  
異數以爾早奉嚴訓抑畏小心曾從艱難有嘉忠恪其  
躡右銓之秩贊予上閤之儀往服恩榮毋忘祇慎

趙碩除閤門祇候制

勅具官某上閤祇事之聯實右銓之華選也爾父頃任  
軍諮以死勤事是用嘉爾忠蓋貶恩後人

成德軍節度使開府儀同三司充萬壽觀使

高世則母楊氏贈秦國夫人制

勅朕修好殊鄰丕隆孝治施澤四海誕揚宏休曠時在  
服之臣咸茂顯親之典具官故母某氏持身淑慎睦族慈  
祥來嬪戚畹之英早著閨門之譽宜爾有子為時名臣  
屬頒大賚之恩式厚追榮之寵易封大國增賁重泉

故妻魏氏贈楚國夫人制

勅朕修好殊鄰丕隆孝治誕敷惠澤施及臣工恩追閨  
門之私禮無存歿之間具官故妻某氏靜專稟質柔惠

宜家行克配於吉人壽卒乖於偕老屬茲大賚宜舉慈  
章載荒大國之封益煥小君之寵營魂未泯尚克歆承  
妻周氏封鄆國夫人制

勅朕外敷鄰盟內隆孝治誕敷惠澤式侈宏休維時將  
相之聯咸燕室家之喜具官某妻某氏令柔秉則婉孌  
凝姿有嘉內助之賢宜茂疏榮之寵載荒名壤易命惟  
新尚克欽承毋忘警戒

左朝請大夫試尚書吏部侍郎魏良臣父樞右



奉議郎致仕制

勅朕丕隆孝治覃澤萬方惟時侍從之臣咸舉顯親之  
典具官父某植德忠厚秉心清懿譽高月旦之評効見  
義方之訓有子在列為時名卿用增文秩之華以厚私  
庭之寵往祇朕命益介壽祺

徽猷閣學士右中奉大夫致仕向子諲父宗明  
贈耀州觀察使制

勅朕孝以寧親格歡心於四海仁而錫類敷惠澤於多

方矧乃甘泉之聯可稽禰廟之報具官故父某操履修  
潔吏能敏彊蔚然肺腑之英籍甚憲臺之譽宜有令子  
為時名卿屬茲慶賚之行載厚蜜章之寵觀風重寄品  
秩惟崇尚幾營魂亦克歆享

資政殿學士左太中大夫提舉臨安府洞霄宮  
韓肖胄故母文氏贈雍國夫人制

勅朕外敷鄰盟內隆孝治誕敷惠澤以侈鴻休眷予舊  
弼之聯必茂顯親之典具官故母某氏柔嘉秉則慈順

宜家行已配於善人壽卒乖於偕老有子則貴為時輔  
臣厥報甚豐疏恩彌渥其易封於大國以增賁於重泉

繼母文氏封越國夫人制

勅具官繼母某氏宅心柔順睦族慈祥胄出相門行配  
君子遂流光於子舍嘗參秉於事樞適茲大賚之行益  
厚顯揚之寵其易封於越壤用增賁於小君申命甚榮  
欽承母念

張滙進直徽猷閣張叔獻進直敷文閣呂用中

王鈇竝除直秘閣制

勅具官某等朕念裕陵克備送終之禮近瞻東越爰興  
卜宅之工庀衆聚材旁資諸郡提綱挈領在得其人爾  
等咸以才猷各將使指緩急中節民靡告勞劇易隨宜  
事無愆素嘉其協濟之効宜從第賞之科或內閣陞華  
或中秘寓直是為高選益勵爾忠

解元除侍衛親軍馬軍都虞候制

勅朕親董六師壯中國安彊之勢遴擇宿將任列營統

御之權寵陞扈衛之聯增重爪牙之寄具官某天資忠  
恪武畧沉雄以勇得名可當八面之敵先登取勝屢舉  
萬全之功昨嚴淮上之屯久賴師中之律慮無遺算坐  
折遐衝載疇乃勞申錫爾祉其超遷於軍候式示寵於  
邊防服我恩榮毋忘報稱

資政殿大學士左正議大夫提舉臨安府洞霄  
宮張守祖杲贈少保制

勅朕修好殊隣丕隆孝治施恩四海誕播宏休眷予政

路之舊人宜厚愍章于乃祖具官故祖某早延世賞克紹家聲備淝上之典刑為江南之望族流光甚遠再世而昌申頒錫類之仁以侈漏泉之澤位陞亞保增賁重泉

祖母侯氏贈榮國夫人制

勅朕修好殊鄰丕隆孝治施恩四海誕播宏休眷予政路之舊人宜厚愍章于王母具官故祖母某氏志能自守仁實可稱早推內助之賢茂行方來之慶有孫甚顯參國之幾爰推錫類之仁庸後漏泉之澤疏封列國式

賁下泉

父彥直贈太保制

勅配天其澤式恢至治之休自仁率親宜厚嚴君之報  
載頒祿典以渙湛恩具官故父某孝行有聞義方甚飭  
庭列芝蘭之秀里標椿桂之芳有子象賢再參大政茲  
因霈渥申錫蜜章位列三公式光幽壤

母王氏贈豫國夫人制

勅具官故母某氏閨門肅整經訓該通茂追絳帳之遺

蹤榮享板輿之安養慶鍾子舍位列輔臣茲因慶賚之行載舉褒揚之典易封大國增賁幽局

妻姚氏封安定郡夫人制

勅朕丕隆孝治施澤臣工眷予舊弼之良亦燕私門之喜具官妻某氏靜專秉質柔惠宜家早推華宗克配君子警戒盡相成之義顯榮得偕老之休茲因大賚之行載厚小君之寵易封大郡用侈殊恩

觀文殿大學士左太中大夫知福州軍州事葉



夢得故祖義叟追封福國公制

勅朕親仁善隣以圖保大之計教民興孝以恢至治之  
休爰推錫類之仁溥及在廷之士眷予舊弼義重顯親  
申錫慈章用光祖廟具官故祖某謙而不伐厚以有容  
實浮于名却形光之外鎮位弗充德卒身老于郎潛有  
孫甚賢維國之幹屬茲大賚宜被湛恩用荒長樂之封  
益侈幽局之寵

祖母劉氏贈韓國夫人制

勅具官故祖母某氏存心溫厚秉則中和積恭儉以肥家體慈祥而合族流澤甚遠再世而昌有孫甚賢維國之幹屬茲大賚宜被湛恩其更湯沐之封莫如韓土之樂營魂未泯茂渥其承

祖母謝氏贈周國夫人制

勅具官故祖母某氏早自令族來嬪高門至誠共蘋藻之羞懿行著室家之美流澤甚遠再世而昌有孫甚賢為時碩輔屬茲慶賚宜被恩榮其更大國之封以侈小

君之寵營魂未泯尚克歆承

故父助贈太傅制

勅朕善隣以為寶既載戢于干戈興孝以導民用覃施  
于雨露眷時舊弼義重顯親申錫愍章式光禰廟具官  
故父某躬載盛績世稱善人有社有民屢布中和之政  
惟忠惟孝卒昌遠大之圖繫予名臣乃爾令子推本教  
忠之訓用彰告第之恩陞公輔一品之崇厚賢者九原  
之寵營魂未泯尚克歆承

故母鼂氏贈鎮國夫人制

勅朕外敦隣盟內隆孝治爰敷惠澤誕播宏休眷予舊弼  
之聯可後顯親之典具官故母某氏簪纓甲族勲舊名  
家溫恭之德配于哲人善慶所終及于令子屬茲霈渥  
宜厚恩榮用更大國之封益茂小君之寵庶幾冥漠尚  
克歆承

韋太后曾祖舜臣追封廣王制

勅朕惟上天垂休爰錫一人之慶東朝回馭式均四海

之歡誕布湛恩以昭景貺推本外家之澤宜旌重祖之  
封具位故曾祖某秉德不回持躬甚厚安時處順雖名  
位之莫彰積善流光致曾孫之丕顯恭惟太母誕育眇  
躬方申東朝就養之誠蓋厚曾門加贈之典載荒大國  
益慰營魂

曾祖母段氏贈秦國夫人制

勅丕隆孝治既承長樂之顏惇叙外嫺宜厚曾門之寵  
具位故曾祖母某氏溫恭秉德勤儉宜家鑒箴圖之戒

以自防共黷藻之羞所勿怠慶流後裔位正母儀用荒  
大國之封易畀全秦之壤魂其未泯尚克歆知

祖子華追封福王制

勅長孫稽厚坤之占祥開文德鄧氏活千人之報慶在  
和熹繫大任之稱尊由顯祖之積善用舉愍典以振幽  
光具位故祖某內恕及人至誠格物行若高山之可仰  
德如韞玉之有輝再世而昌惟天作合茲因霈澤載啟  
大邦用增多於王封以永綏於泉戶

祖母杜氏贈鎮國夫人制

勅漏泉之澤方覃及於綿區顯親之章宜上推於再世  
恩厚祖配義先母家具位故祖母某氏淑慎柔嘉均于  
九族惠和雍肅儀於高門富貴不在其身子孫克昌于  
後光啟濯龍之御誕膺履畝之祥爰舉愍章再荒大國  
用侈小君之寵永為幽壤之榮

父安禮追封充王制

勅德厚者報必豐位隆者禮亦異繫眇躬誕育於文母

惟慶源實本於嚴君可無徽章以賁幽壤具位故父某  
抱材弗試循理而趨至行無瑕如珪璋之特達剛節弗  
改若松栢之後凋慶鍾子女之祥尊為天下之母充國  
甚大王爵彌隆永彰贈襚之榮克慰焄蒿之感

母宋氏贈陳曹國夫人制

勅曠蕩之澤式昭漏泉之恩鞠養之慈宜隆報本之禮  
茂建增封之典有光刻蜜之章具位故母某氏嬪于高  
門休有令德蘊山河容潤之美克配善人嚴舅姑盥饋



之儀以肥家道方慈寧就九重之養宜禰配荒兩國之  
封名數益隆情文具稱營魂如在茂渥其承

寶文閣學士左朝請大夫知明州軍州事梁汝  
嘉父固贈右通議大夫制

勅朕荷天垂休丕隆孝治格歡心於四海敷厚澤於羣  
工眷予持橐之良肆茂顯親之渥具官故父某純誠內  
秉景行外章實孚於名爵不充德慶鍾子舍之遠位聯  
常伯之華屬錫賚之渙恩宜追榮之申命用陞崇秩以

慰營魂

母何氏贈淑人制

勅具官故母某氏溫恭內秉淑慎外持肅出相門德配君子慶遂鍾於賢嗣位嘗冠於地官屬頌大賚之恩宜厚追榮之典錫名甚寵式慰重泉

妻葉氏封淑人制

勅國有大賚澤覃四方凡茲在服之臣咸錫既多之祉恩章甚渥下迨室家具官妻某氏柔靜宅心溫恭植德

來儀令族禮先中饋之羞善相其夫位致甘泉之列爰  
頒惠需用錫休稱永貽偕老之榮尚懋相成之道

徽猷閣直學士左朝奉郎提舉江州太平觀州  
秘父位贈右中奉大夫制

勅朕修好殊隣丕隆孝治加惠四海誕敷宏休眷予持  
橐之良可後顯親之渥具官故父某景行可仰清規不  
渝義方存教子之忠陰德厚高門之報宜爾賢嗣列于  
近班屬頒大賚之恩宜渙追榮之寵申錫休命永光下

泉

母宋氏贈碩人制

勅具官故母某氏溫恭秉德淑慎為儀慈惠宜其家人

柔嘉克配君子

下同

徽猷閣直學士左通議大夫提舉亳州明道宮

洪擬父固贈右金紫光祿大夫制

勅朕修好殊鄰丕隆孝治加惠四海誕揚宏休眷予持  
橐之英可後顯親之渥具官故父某抱材不試履行無

疵義方存過庭之規陰德厚高門之報宜爾令子列于  
近班屬頒漏泉之恩用彰刻蜜之典申錫崇秩式慰營  
魂

母鄧氏贈永寧郡夫人制

勅具官故母某氏恭而立德儉以飭躬慈惠宜其家人  
柔嘉克配君子積善之報有子而賢位既列於從班恩  
遂隆於禰配易封大郡式賁重泉

敷文閣直學士右朝散大夫知臨安軍府事兩

浙西路安撫使俞侯父溫贈左銀青光祿大夫制

勅朕荷天垂休丕隆孝治爰敷德澤以惠多方眷予持  
橐之良肆茂顯親之渥具官故父某令名表世博學決  
科效官著清白之規通籍及高華之秩慶鍾令子位列  
從班屬頒大賚之恩宜厚追榮之寵其陟文階之峻式  
為幽壤之光

故母萬氏贈文安郡夫人制

勅具官故母某氏柔嘉有則淑慎其儀佩箴圖之戒以

自防奉蘋藻之羞而不怠慶鍾令子位列從班屬頒大  
賚之恩宜厚追榮之典其易封於大郡以申賁於幽局

母林氏封孺人制

勅具官母某氏仁而厚下禮以齊家令名久而愈芳眉  
壽宜其偕老慶流子舍位列天官其申封號之華以侈  
私庭之寵往祇朕命益務欽承

故妻史氏贈碩人制

勅國有大賚澤覃庶工恩及閨門之私禮無存歿之間

具官某故妻某氏奉身勤儉睦族慈祥作配善人不克偕老茲屬漏泉之惠宜疏刻蜜之章申錫榮名永光窀穸

故妻陳氏贈碩人制

勅具官某故妻某氏靜專稟質柔惠宜家喬出高門配于厚德生莫諧於偕老逝宜厚於追榮顯號載加幽宅其吉

妻趙氏封碩人制



勅國有大賚澤均四方惟時侍從之聯亦燕室家之喜  
具官某妻某氏修身淑慎秉德惠和不忘夙夜之勤克  
謹舅姑之奉盡婦之道成夫之名宜申錫於徽章以增  
光於私室往服朕命益務欽承

左朝請郎尚書戶部沈昭遠父千贈左通議大  
夫制

勅國有大賚澤覃四方眷爾在廷之臣咸動思親之念  
申舉懿典增賁重泉具官故父某早登儒科見推善類

初無心於宦達遂終老於郎潛善積厥躬慶貽其後繁  
爾令子為吾近臣肆因霽澤之恩用陟高華之秩魂其  
未泯尚克歆承

故母陳氏贈碩人制

勅國有大賚澤覃四方凡茲在列之臣咸均錫類之祉  
具官故母某氏早由令族來嬪高門至誠共蘋藻之羞  
懿行著室家之美宜有令子為時聞人進膺持橐之華  
尤深陟屺之慕益峻封號庶光幽局

妻曹氏封碩人制

勅國有大賚澤覃四方凡茲在列之臣咸錫既多之祉  
恩章甚渥下及室家具官妻某氏柔靜宅心溫恭植德  
來儀令族禮先中饋之羞善相其夫位致甘泉之列爰  
頒恩霈用錫休稱永貽偕老之榮尚懋相成之道

端明殿學士左朝散大夫提舉臨安府洞霄宮  
胡松年父增贈少師制

勅上穹垂祐既推從欲之仁萬方均休爰舉顯親之典

矧予舊弼可後疏思具官故父某盛德鎮浮純誠敦薄  
志雖專於用晦澤遂溢於流光有子仁賢嘗位宥密推  
本教忠之訓宜蒙加贈之章冠孤棘之聯益彰崇貴增  
禰廟之寵式慰焄蒿

前母李氏贈秦國夫人制

勅具官故母某氏植德溫恭律身勤儉善有餘於作則澤  
遂溢於流光位予輔臣繄爾賢子屬茲大賚宜渙恩章  
荒大國之封益新湯沐厚幽局之寵式慰焄蒿

故母錢氏贈魯國夫人制

勅具官故母某氏婦德令柔閨風淑慎克配君子實生  
良臣肆推流澤之長宜厚愍章之渥載新湯沐用荒東  
魯之封式慰君蒿尚侈小君之寵

右通直郎試尚書刑部侍郎周聿故父子通贈  
右太中大夫制

勅朕荷天垂休丕隆孝治誕敷惠澤以綏四方惟時持  
橐之聯咸舉顯親之典具官故父某操履無玷政事有

聞于公高治獄之功孤突著教忠之訓宜爾有子列于  
近班屬茲大賚之恩庸厚追榮之寵載陞崇秩式賁下  
泉

前母王氏贈碩人制

勅具官故前母某氏溫恭秉德勤儉宜家婦功不廢於  
組紉祀事克羞於蘋藻宜有子舍列予從班屬頒大賚  
之恩庸厚追榮之寵疏封益顯增賁幽局

故母王氏贈碩人制

勅具官故母某氏修身淑慎睦族慈祥懿行宜其家人  
令名克配君子是生賢嗣為時從臣

下同

故妻子氏贈碩人制

勅國有大賚澤覃庶工恩逮閨門之私禮無存歿之間  
具官故妻某氏柔嘉有則箴誨是遵德既篤於宜家壽  
莫諧於偕老屬頒渙渥錫命有加魂其有知式克歆享

妻石氏封碩人制

勅國有大賚澤覃庶工眷予侍從之聯亦燕室家之喜

具官妻某氏宅心淵淨植德溫柔早以令儀克配君子  
屬皇家之有慶宜顯號之申頌往服異恩無忘欽慎

左承議郎權工部尚書莫將父援贈左太中大

夫制

勅朕孝以寧親格歡心於四表仁而錫類敷惠澤於多  
方雖七品歸休位不充德而八座通貴子則象賢屬茲  
慶賚之行宜厚褒揚之典太中顯秩實次從班侈我恩  
休永光幽壤



母胡氏贈碩人制

勅朕丕隆孝治覃澤四方惟時侍從之臣咸舉顯親之  
典具官故母某氏早以華族嬪于高門躬懿行以宜家  
人藹令名以配君子澤鍾賢嗣位長冬官屬茲慶賚之  
行宜厚褒揚之典申錫封號永賁幽局

故妻李氏贈碩人制

勅曠蕩之澤均被四方兼存歿以疏恩極哀榮而從厚  
眷予從列宜迨室家具官故妻某氏孝順慈祥均于九

族惠和雍肅儀於高門善相其夫致位通顯德則甚厚  
命乃不融申錫榮名永光泉戶

故妻李氏贈碩人制

勅具官故妻某氏法度自循少有賢行盥饋動循於壺  
則組紉不廢於婦功下同

妻章氏封碩人制

勅夫婦有相成之道茲本人倫室家申燕喜之私莫踰  
國寵具官妻某氏幼親姆訓胄出相門典刑餘謝女之

風伉儷得梁鴻之配休有令聞宜其家人茲因慶賚之行式厚褒榮之典錫以顯號往務欽承

右中大夫充徽猷閣待制葉煥父某贈少保制勅朕外敦鄰盟內隆孝治誕敷德澤以侈洪休瞻時持橐之英咸茂顯親之寵具官故父某學窮聖域行立世模雖聲名稱重於本朝而爵位不登於法從有子則貴厥報彌豐載陞亞保之聯式厚幽局之渥營魂未泯式克歆承

故母陳氏贈慶國夫人制

勅具官故母某氏秉心柔順睦族慈祥行克配於善人  
壽卒乖於偕老有子則貴厥報甚豐易大國以疏封慰  
營魂於未泯

繼母江氏贈廣國夫人制

勅具官故繼母某氏靜專稟質淑慎持身胄出華宗行  
配君子慶遂流於子舍爵早列於從班屬頒大賚之恩  
宜厚追榮之典易封大國式賁重泉

竇文閣直學士左朝議大夫知靜江軍府事兼  
本路經畧安撫使張宗元父澤贈右奉直大夫

制

勅朕修好殊鄰丕隆孝治施恩四海誕播宏休眷時在  
列之臣咸茂顯親之典具官故父某修身有道樂善無  
方流澤及其後人有子登於顯位屬茲大賚申錫愍章  
遂寵陟於崇階益增光於幽壤

母田氏贈碩人制

勅具官故母某氏溫恭秉則勤儉肥家善有餘於厥躬  
慶遂鍾於乃子屬茲大賚申錫愍章用寵加於榮名益  
增賁於幽壤

妻劉氏封碩人制

勅國有大賚澤及庶工眷予侍從之聯亦燕室家之喜  
具官妻某氏靜專稟質溫靚凝姿來嬪高門克配令德  
屬一人之有慶渙異數以疏恩加爾榮名式綏偕老

顯謨閣直學士左太中大夫提舉江州太平觀

康執權父遠贈右光祿大夫制

勅朕外敦鄰盟內隆孝治誕敷惠澤以侈宏休眷予持橐  
之聯咸茂顯親之典具官故父杲秉德信厚履行中庸  
積善貽其後人有子登于法從屬茲需渥申錫愍章進  
陞二品之崇用渙九泉之寵

母范氏贈永嘉郡夫人制

勅具官故母杲氏柔嘉秉則法度持身令德宜其家人  
有子登于禁從屬茲需渥申錫愍章用正位於小君以

增光於幽壤

資政殿學士左朝奉大夫知紹興軍府事樓炤

父居明贈太子太保制

勅朕親仁善鄰以圖保大之計教民興孝以彰至治之  
休爰推錫類之恩溥及在廷之士眷時輔弼之舊實深  
霜露之思申舉愍章式光禰廟具官故父某謙而不伐  
厚以有容位雖老於郎潛既享年高之樂福方延於子  
貴益昌身後之榮宮保之聯品秩彌峻增賁幽壤尚其



歌咏

母范氏贈蘄郡夫人制

勅朕善鄰以為寶既載戢於干戈興孝以導民用廣敷  
於雨露眷時舊弼義重顯親申錫慈章式光禰配具官  
故母某氏梱則甚懿婦儀不愆慈祥致家道之肥輝光  
及子舍之遠屬茲惠澤宜侈封恩易郡蘄春益新湯沐  
母歐陽氏贈武陵郡夫人制

勅具官故母某氏宅心淵靜積行溫柔令德宜其家人

餘慶鍾於子舍屬茲惠澤用侈恩封易大郡於武陵俾增光於幽壤

拱衛大夫華州觀察使充廣南東路馬步軍副總管兼知循州韓京祖楚贈保義郎制

勅褒贈之典厥有等差維時貤恩實越常制既以慰為人子孫之念亦足助一時風教之淳具官故祖某履行無疵抱材不試積善彰於故里流慶及其後人是生聞孫為世梟將辭官三等有嘉報本之誠錫命九泉用侈

方來之寵魂其不昧尚克歆承

祖母馬氏贈安人制

勅具官故祖母某氏勤儉律身慈祥睦族積此宜家之美自然流慶之長有孫而賢致位甚顯辭三官而弗受可見誠忱易一命以疏榮遂光存歿魂其不昧尚克歆承

繼祖母李氏贈安人制

勅具官故繼祖母某氏婉孌凝姿溫恭秉則夙著閨門之美共推宗族之仁流慶甚長有孫而顯

下同詞

徽猷閣直學士左朝請大夫提舉江州太平觀  
李擢父公彥贈左銀青光祿大夫制

勅朕修好殊鄰丕隆孝治施澤四海式侈宏休惟時法  
從之聯茂舉顯親之典具官故父某忠清勵節文藝決  
科屢膺持節之華尤著平刑之績流光甚遠有子則賢  
為時名卿位列常伯屬湛恩之誕布宜禰室之增榮品  
秩彌崇永光泉戶

母孫氏贈太寧郡夫人制

勅具官故母某氏簪紳令族詩禮名家歸于善人休有  
賢行慶鍾乃子秩峻近班屬誕布於國恩宜增榮於家  
廟易封大郡申慰營魂

顯謨閣直學士左朝散大夫提舉江州太平觀  
常同父安民贈左正議大夫制

勅朕外厚鄰盟內隆孝治爰敷惠澤誕播宏休肆予持  
橐之聯咸茂顯親之典具官故父某養氣至大用心甚  
剛德行昭一時之範模忠言著百世之龜鑑天厚厥報

子顯於朝屬頒大賚之恩宜享追榮之寵文階益峻幽壤有光

故母孫氏贈碩人制

勅具官故母某氏奉身勤儉睦族慈和克修蘋藻之誠益謹箴圖之戒宜爾有子列于近班屬頒大賚之恩宜厚追榮之寵申錫顯號式光重泉

故繼母袁氏贈碩人制

勅具官故繼母某氏令儀可則懿範有聞淑慎宜其家

人柔嘉克配君子慶貽子舍位列近班屬頌大賚之恩  
益厚追榮之典申錫顯號式光重泉

故妻滕氏贈碩人制

勅國有大賚澤及羣工恩霑閨門之私禮無存歿之間  
具官故妻某氏早繇華族克配善人義雖謹於相成壽  
終乖於偕老屬茲霈渥宜厚追榮申錫愍章式光泉戶  
妻方氏封碩人制

勅國有大賚澤及羣工眷予侍從之聯亦燕室家之喜

具官妻某氏凝姿婉孌賦性柔和善相其夫致位通顯  
屬茲霈渥宜厚褒嘉申錫榮名益思欽慎

左朝議大夫試尚書兵部侍郎兼侍講程瑀父  
柟贈右奉直大夫制

勅朕孝通神明既格寧親之慶澤被臣庶咸推報本之  
恩矧予侍從之臣可後褒榮之典具官故父某躬載令  
德世稱善人韋賢陋滿籛之遺孤突謹教忠之訓宜爾  
有子為時名卿用舉卹章以光幽壤品秩益峻尚克歆



承

母金氏贈碩人制

勅具官故母某氏早以華族來嬪高門勤儉播嚴君之風均壹備賢母之德宜爾令子為時名卿用舉卹章以光幽壤封號益顯尚克歆承

妻沈氏封碩人制

勅朕丕隆孝治恩及羣臣維時侍從之聯亦燕室家之喜具官妻某氏禮容淑慎德範靜專推閨門內助之賢

得警戒相成之道茲因需澤益厚徽章申錫榮名往承  
母數

保寧軍承宣使知閣門事兼客省四方館事藍

公佐父安石贈少傅制

勅朕修好殊鄰丕隆孝治施恩四海誕播宏休眷予在  
列之臣宜茂顯親之典具官故父某溫恭植德忠恪事  
君早有能名典司內省念流光之未遠至今予而彌昌  
屬茲大賚之行寢被愍章之渥寵陞亞傅增賁幽局

故母竇氏贈魏國夫人制

勅具官故母某氏靜專稟質戒慎飭躬早推中饋之賢  
克著宜家之譽念流光之未達至今子而彌昌屬茲大  
賚之行寢被慈章之渥宜封全魏增賁幽局

親衛大夫忠州刺史權發遣河南府路兵馬副  
都監御前同副都統制梁興父建贈武翼郎制  
勅盡臣節者求諸孝子之門蹈義方者必本嚴君之訓  
儻有士能自奮立則於親安可弭忘具官故父某由閭

閭而興識逆順之理親詔乃子糾合義兵雖間關同厄  
於百罹然忠憤獨先於一死迨此策勲之際難從常典  
之拘其超贈於武階以申恩於幽壤營魂未泯尚克歆  
承

母喬氏贈恭人制

勅盡臣節者求諸孝子之門蹈義方者必本慈母之訓  
儻有士能自奮立則於親安可弭忘具官故母某氏起  
由隱微早識逆順是為烈婦生此奇男雖間關同厄於

百罹然忠憤何辭於一死逮此策勲之際難從常典之  
拘其增封號之華以示襚恩之厚營魂未泯尚克歆承  
左朝奉郎新除給事中兼侍講李易父孝友贈  
右朝請郎制

勅朕荷天之休丕隆孝治爰敷惠澤以賚多方眷予持  
橐之臣咸動顯親之念申頒懿典式示湛恩具官故父  
某好禮不踰耽書自信多能而弗靳蓋衆無求而安於  
守貧以利物存心以教子為樂是宜流慶享此褒榮其

從陞秩之華以厚幽局之寵

母蔣氏贈令人制

勅載稽令典用錫蜜章具官故母某氏婦義而從母嚴而愛坐致閨門之肅不因貧窶而憂嘗鬻髮以延賓亦斷機而誨子老而享福危則教忠遂沐湛恩特加異數茲因霈渥申賁令名尚幾營魂歆此殊寵

妻牛氏封令人制

勅朕荷天之休丕隆孝治爰敷惠澤以賚多方眷予侍

從之臣亦燕室家之喜具官妻某氏早有賢行宜其家  
人克修盟饋之儀夙謹閨門之戒既盡相成之義宜蒙  
偕老之榮載錫令名式彰內助

左中奉大夫充敷文閣待制施垌父任贈左宣  
奉大夫制

勅朕外敦鄰盟內隆孝治爰敷惠澤誕播宏休維時侍  
從之聯咸茂顯親之典具官故父某儒學自奮仕塗有  
光令譽藹於一時溫光溢於後嗣屬茲大賚申錫徽章

載陞品秩之崇式示泉扃之渥魂其不昧尚克歆承

故妻李氏贈令人制

勅朕荷天之休丕隆孝治爰敷厚澤以惠庶工恩及閨  
門之私禮無存歿之間具官故妻某氏早以令族嬪于  
高門善相其夫夙著相成之譽天嗇厥壽遽乖偕老之

榮申錫令名永光幽壤

故妻吳氏云克修  
梱則綽著婦儀

右朝請郎充敷文閣待制鼂謙之父端仁贈特

進制



勅朕修好殊鄰丕隆孝治施恩四海誕播宏休維時在  
列之臣咸茂顯親之典具官故父某早由文學列在儒  
科名揚伯仲之間業傳父祖之遠流慶未艾有子俱賢  
屬茲大賚之行宜被追榮之渥陞峻極品益光幽宅

故嫡母葉氏贈濟陽郡夫人制

勅具官故嫡母某氏令儀著于閨閭慈訓協於箴圖繇  
積善之彌深致流芳之不替澤鍾賢嗣位列從班屬茲  
大賚之行宜被追榮之渥易封大郡申賁幽局

右廸功郎廖鵬飛父年八十四封右承務郎致仕母吳氏年八十二封孺人制

勅具官某朕獲侍東朝以天下養因心廣愛人孰無親嘉爾高年有子從宦不待通籍而秩以官往祇恩榮益綏壽祉

欽定四庫全書

東憲集卷八

宋 張擴 撰

制三

榮巖除成都府路轉運判官制

勅具官某朕惟川陝之區重兵列屯饋餉之資實仰全蜀將漕之職必惟其人以爾政術吏能見稱彊敏飛芻輓粟課最甚優有嘉湖外之勤具易坤維之節效見已試益殫厥心

范正國除湖北路轉運判官制

勅朕惟國家之政財用為先顧一時調度之煩賴諸路轉輸之助以爾名臣之子克紹家聲嘗藹譽於郎闈屢宣風於使節効見已試踐歷滋深具分將漕之權往安重湖之北裕民足食激濁揚清爾職當為毋待朕訓

万俟虎除荆湖南路轉運判官制

勅具官某朕慎擇能臣分持使節維時將漕之職實藉疏通之材以爾忠信秉心精彊試吏踐歷滋久詳練有

聞往監重湖之南庶資國計之助朕講求民瘼檢柅吏姦使利源無奪於魚并催科不困於追擾是為稱職予則汝嘉

李芝除潼川府路轉運判官制

勅具官某士有懷瑾握瑜埋光鏟采陸沉州縣困於小官朕於稠人之中而用之所以振滯淹明公舉也今一二侍臣薦爾材行謂博學有守吏能可觀淪於孤遠無路自達誠有味其言朕東蜀漕計寄委尤重以爾充使

者之選於爾亦少伸矣夫足國裕民古人有理財之術  
揚清激濁惟仁且勇者能之爾其夙夜盡公勉行爾志  
盖非獨以稱朕期待之厚是亦不負所知也

林勲除廣南東路轉運判官制

勅具官某等嶺外郡縣之衆不減中州然而風土卑惡  
士大夫視官府猶傳舍然吏以去朝廷且遠並緣為姦  
相煽成俗財賦所聚非詳練疏通之人其能究心乎以  
爾勲論議精明深達治本以爾利用風力彊敏灼知民

情用申錫於綸言俾分持於使節朕方篤近舉遠一視同仁毋謂遐荒如在庭戶往祇厥職尚務交修

李宏除淮西轉運判官制

勅具官某朕慎擇能臣經理淮甸維時將漕之職尤須通敏之才以爾智慮精深風力彊濟更事任劇繁之久知民間疾苦之詳申錫命書俾揚使節其參飛輓之計益殫夙夜之勤

紀交除淮南轉運判官制

勅具官某朕惟長淮以東戶口彫瘵田萊多荒民力未裕轉輸之任尤務得人爾敏於吏才緣以儒雅比更郡寄休有政聲其分使節之華益究利源之入必使財豐而民不告病法行而吏不敢欺足食足兵是為稱職

虞祺除夔州路轉運判官制

勅具官某部使者分道持節委寄非輕維時將漕之臣實總裕民之政求諸已試茲謂得人以爾學術深醇吏能精敏頃膺推擇往任轉輸發軔而民忘勞峙任而食



已足載醕治最俾案已東其殫夙夜之勤以稱光華之遣

林又工部員外郎陞郎中制

勅具官某文昌列屬皆以才選叙正厥位乃有彛章以爾政事詳明居官可紀擢贊起部曾未淹時其頒申命之休俾峻諸郎之列益思匪懈用究令名

梁弁右司員外郎陞郎中制

勅具官某眷時宰士之聯分頒中臺之務叙正郎位厥

有彛章以爾早著能名屢膺器使吏曹繁劇雅推銓綜之公省闈高華洊効彌綸之益陞峻資序法在攸司匪朕爾私欽承毋斁

李若谷左司員外郎陞郎中制

勅具官某中臺總萬事之繁宰掾極一時之選乃若叙正郎位則有彛章以爾望重時髦學通世務冬官列屬早揚譽處之休省闈聯華洊著彌綸之効陞峻資序法在攸司匪朕爾私往承毋斁

米友仁屯田員外郎陞郎中制

勅具官某文昌列曹皆以才選叙正厥位則有彛章參  
稽數歲之勞已埒諸郎之秩以爾詞藝美發風猷敏彊  
頃擢屯田繕工游陞華於起部有嘉揚歷益著靖共往  
祇申命之休式究無窮之聞

李若谷除屯田郎官制

勅具官某文昌設屬其選甚高惟時司田必用吉士以  
爾學問談洽吏能敏強出守偏州茂著于蕃之績入丞大

匠備觀濟劇之能載酬譽處之休俾預甄陞之列往祇厥次益懋爾為

錢時敏除兵部郎官王言恭除駕部郎官吳秉信除屯田郎官制

勅具官某等朕旁求多士寘彼周行為郎省闡茲謂高選取諸久次俾能其官以爾時敏蔚然文華見推流輩以爾言恭通達世務詳練有聞以爾秉信業藉於勤議論不苟用並頒於書命以列屬於文昌益究爾猷往贊

而長

林父除工部郎官制

勅具官某起部掌百工之政今維時郎選必務得人以爾性資疏通吏能敏劬丞於棘寺詳練有聞其列屬於冬官俾交修於職業益思自勵以稱所蒙

張宇除吏部郎官張拂除祠部郎官制

勅文昌之屬皆朕高選雖職有劇易而所以委任之意則均也苟非其人不以輕授以爾宇職業之修見於已

試以爾拂學行之美達於朕聞命爾同升僉曰惟允夫  
銓選之法嚴則流品不雜祠曹之職舉則祀事孔時服  
我訓詞益思懋勉

王循友除倉部郎官陳抃除都官郎官制

勅具官某等太微垂象郎位著袞烏之躔文昌列曹中  
行高刑戶之選擇屬惟慎得人乃光以爾循友學自家  
傳見於文采以爾抃吏能精敏裁剴有餘其並列於省  
闈庶以觀於材業夫倉庾謹出納之數徒隸存廢置之

宜苟盡心焉則為稱職

陳時舉除考功郎官制

勅具官某吏部在六官號稱繁劇然而左右銓各有攸司乃若司績則凡累日月而考績績功閔而為任者無問左右銓皆關決焉事固倍矣而尊名節惠之文與奉常者猶未論也其任顧不重歟以爾學術純正氣節剛方頃自外服擢寘紀綱之地閱歲未久譽望甚休今朕覲汝徃列天官之屬爾其修明職業檢提吏姦以無負朕

知則爾亦有無窮之聞尚勉之哉

宋之才除考功郎官制

勅具官某朕開三館以儲人材涵養既深間任以事惟  
考功號稱繁劇以試吏可觀剴裁以爾操履靖恭文史  
足用再登冊府聞見益新其頒書命之華往列天官之  
屬緣以儒雅毋徇苛文

米友仁除屯田郎官制

勅具官某朕罷兵畱屯經理邊備考古人便宜之計圖



當今耕殖之功惟時司田實任是責以爾風力强敏智術疏通出膺使節之華入貳繕工之劇踐揚滋久譽處彌休其列屬於冬官俾交修於職業往佐而長益懋爾為

李景山朱斐竝除刑部郎官制

勅具官某等中臺郎位厥選甚高憲部持刑委寄尤重必求望實之素以膺推擇之公以爾景山學行有聞明於治道以爾斐操履無玷達乎吏方宜從棘寺之聯竝

列秋官之屬往贊而長益究乃心

李志行吳臬竝除刑部郎官制

勅具官臬等文昌設屬郎位甚高秋官議刑選任尤重  
眷時吉士申錫綸言以爾志行通乎大方存心克恕以  
爾臬傳以古誼用法惟平擢居棘寺之聯深得惠文之  
要寵陞厥次是因爾能往盡乃心式贊而長

王楊英周執羔竝除吏部郎官制

勅具官臬等晉吏部郎闕文帝訪其人而鍾會以謂裴

楷清通王戎簡要皆其選也今朕得二士於圖書之府  
使贊銓衡其庶幾乎如楊英詞采菁華所蘊者富如執  
羔操履端靖所存者誠同升著作之庭不私褒貶之實  
往論人物宜爾為優其圖流品之清以繼前賢之躅

王達如除吏部郎官制

勅具官某六官分職吏部最稱劇繁諸郎得人群材賴  
以銓綜以爾學識深遠議論詳明擢陞烏府之聯休有  
紀綱之助申頒休命往贊天官益懋爾為以究令聞

李易除敷文閣待制宮觀制

勅入而居獻納之地近臣所以盡規出而奉燕閒之祠  
明主所以從欲內外之勢雖異待遇之禮惟均具官某  
學問淹諳文詞敏瞻早飛聲於多士游揚譽於禁塗西  
掖代言號令得中和之氣東臺平奏對章推論駁之公  
方厚倚於老成乃力祈於引去重違爾志宜錫異恩其  
陞次對之華俾遂珍庭之逸毋忘忠告而有遐心

吳芾除祕書省正字制

勅具官某圖書之府夙號清華顧匪時髦曷膺妙選以爾學造乎理行適厥中見稱士林久而彌劭往參羣彥刊正祕文益勵才猷嗣有褒陟

沈介洪造潘良能游操并除祕書省正字制

勅具官某等朕開冊府以儲人材旁收拔茅之英庶資作室之用爾等咸以時望擢秀儒林或中國家詞藝之科或蘊父兄淵源之學器識可以致遠議論可以濟時朕嘗俾爾刪定律令時王之制既知之矣茲復命為判

正之職抑將使爾博極羣書日新聞見爾知朕所以期爾之意則尚勉之哉

陳誠之除祕書省正字制

勅具官臬去古既遠圖書所傳日益訛謬朕開冊府設屬其間豈徒然哉以爾文藝英華學問談洽大廷賜對方嘉爾能頃披請事之章欲遂桂冠之樂用增爾秩庶榮其歸尚勤葑石之功以厚壽祺之報

歸正王勝等二十八人各轉一官制

勅具官臬爾等身陷敵境心存本朝率衆來歸備嘗險阻錫以命秩用勸乃忠

宋迪運糧有勞轉一官制

勅具官臬頃者川陝用武幕府上功爾以饋餉之勞賞預增秩尚稽直授中錫贊書服我恩榮益思報稱

倉部郎官王循友交割歲幣有勞特轉一官制

勅具官臬勞於王事為臣則知盡忠說於見知為君則務行賞以爾履行夷粹居官敏彊比繇郎曹出勤王事

夙戒道途之役靡懷居處之安直從增秩之華以厚言歸之寵往祇朕命毋怠欽承

戶部郎官林大聲特轉一官制

勅具官某朕舉湖廣之賦以給上流之師總領之權亦云重矣儻饋餉之無乏豈褒勸之可忘爾比繇郎曹出任繁劇閱歲未幾以辦治聞其頒增秩之恩益圖善後之計

薛興等大閱挽弓應格轉官制



勅具官某等三時務農一時講武古之制也爾等咸以大閱挽彊應格朕何愛增秩之賞以為爾勸哉

奉迎梓宮禮儀使司禮官吳棫轉左承議郎制

勅具官某朕惟梓宮北歸中外悲慕言念入疆之始有資迎護之勞禮官在旁實備咨訪肆增厥秩用勸爾勤

奉迎梓宮禮儀使司屬官曹雲等各轉一官制

勅具官某等第賞有差各增爾秩朕命甚渥其務欽承

殯宮總護使司屬官朱敦儒等各轉一官制

勅具官某等朕愴念寧神之孝有嚴復土之期肆命大臣俾之總護因事設屬亦惟其人爾等吏能敏彊典故詳練禮無違者抑有助焉增秩示恩往承母怠

殯宮橋道頓遞使司屬官王循友等各轉一官  
制

勅具官某等朕愴念寧神之孝有嚴復土之期方輟車之載途必頓舍之如禮爾等咸以健敏列屬攸司見謂賢勞宜頒信賞其增厥秩往務欽承

殯宮總護使司屬官王曦等各轉一官制

勅具官某等朕愴念寧神之孝有嚴復土之期肆命大臣使之總護爾等咸以材譖列屬其間見謂賢勞宜頒信賞各增爾秩往務欽承

殯宮修奉司屬官王滋劉皓孟逢原各於遙郡上轉行一官制

勅具官某等朕愴念祐陵送終之禮肇興東越因山之工肆命虎臣董茲大役爾等咸以材譖列屬其間趨事

勸功迄底成績用頒信賞以旌其勤服我恩勞毋怠勉  
勵

殲宮按行使司復按使司屬官李廩楊忒各轉  
一官制

勅具官臬等朕愴念寧神之孝有嚴復土之期爰遣近  
臣按行兆域爾等咸以材諳協助惟勤肆增厥官以厚  
賢勞之報

奉迎兩宮主管所官屬張莘等各轉一官制

勅具官某等朕恭惟太母回鑒中外稱賀奉迎官吏趨走在途肆醕其勞各增爾秩往思勉勵用稱朕恩

呂靖等改合入官呂大舉等各轉一官制

勅具官某等朕修奉祐陵有嚴大役分遣使指協濟事功庀衆聚材實資其屬爾等咸以健敏見謂賢勞增秩示恩往承母急

皇叔右監門衛大將軍文州刺史士諳磨勘轉  
官制

勅具官某等朕疏恩睦族務增本支之彊遷秩限年蓋襲祖宗之舊以爾持身甚謹樂善有聞盡內朝之恭為宗子之秀積歲滋久於法應陞寵以兵團是為異典益思自勵期稱所蒙

兩宮扈從主管官昭宣使貴州團練使內侍省副都知藍珪轉兩官制

勅朕恭膺上帝之休獲奉東朝之養凡茲祇事之列預有奉迎之勞中錫贊書以彰寵渥具官某誠信自竭謹

厚有聞典司官省之嚴彌勵公忠之操比因臨遣式副  
予懷龍輿在途禮無違者峻陟觀風之任用增使範之  
華服我恩休益勤夙夜

垂拱殿成武德郎高珪武經郎馮寶等各轉一

### 官制

勅具官某等朕申講會朝之儀聿新廣殿之制旁資衆  
力協濟一時爾等咸以勞能遇事輒辦迨此落成之始  
宜頒增秩之榮往服恩休益圖報稱

敦武郎陳諒等奉使大金國信所轉官制

勅具官某朕間遣輔臣修好鄰國爾等從役萬里跋涉  
良勞其增一官以厚言還之報

垂拱殿成臨安府屬縣方懋德王鞏李份陸康  
民黃匪躬衛闐田欽亮范德冲章著各轉一官

制

勅具官某等朕申講會朝之儀聿新廣殿之制凡茲營  
繕允賴勤勞以爾等各以材能分宰諸縣聚材不愆於



素用民適得其均逮此落成肆增爾秩庸示勸賞往務  
欽承

李流馬耆年梁抃等權貨務賞各轉一官制

勅具官某等朕權鹽茶之贏以佐國用法詳令具公私  
便之爾等善於其職推行有方歲終會課以增羨聞肆  
頒賞秩以為趨事者之勸

太史局冬官正錢希傑王敦祐各轉一官制

勅具官某等間者修奉祐陵實國大事一時官吏協助

惟勤汝等咸以能稱用增厥秩往祇渙渥母忘欽承

應辦中官冊寶鄭璵張云裘多見于恭李炳堯  
吉昌汪紳龔道盧璿各轉一官制

勅具官臬等朕申講彌文交修百度凡服飾器用咸取  
具焉豈一手足之力哉爾等事不辭難盡心夙夜及茲  
底績予實汝嘉各增厥官式勸能者

黃繹等六員各轉一官制

勅具官某等

上詞同

凡茲祇事之人宜渙錄勞之賞肆

增爾秩往務欽承

武顯大夫孔禮等迎護梓宮屬官各轉一官制  
勅具官某等間者梓宮言還中外興慕入境之始迎護  
良勞爾等來自營屯不愛其力各增厥秩用答爾勞

衛茂實永祐陵殯宮鈐轄階官遙郡上各轉一  
官制

勅朕愴念祐陵克備送終之禮近瞻東越爰興卜宅之  
工乃資信臣式董大役逮茲復土用旌殊勞具官某抑

畏秉心靖共就列進退可度尤嚴帥屬之儀夙夜惟勤  
彌厲在公之操屬因山之庀衆節鑿鼓以勸功塋域肇  
新神靈載妥申錫異數以示湛恩其陞留務之華并陟  
橫階之峻往祇朕命毋忘乃忠

迎護梓宮禮儀使司屬官唐裕等二十九員各  
轉一官制

勅具官某等上詞同凡茲祇事之人宜有錄勞之賞肆  
增厥秩往務欽承

宋唐卿永祐陵殯宮復按副使橫行遙郡上各  
轉一官制

勅朕愴念祐陵克備送終之禮近瞻東越爰興卜宅之  
工臨遣從臣按行封域爰資內侍往介使華逮茲第賞  
之初宜厚錄勞之報具官某塞淵內秉恭恪外持左右  
罔匪正人備勤夙夜動容莫不中禮尤肅宮庭屬復土  
之告期首押圖而來上有嘉盡瘁宜錫異恩峻橫列以  
增華陟觀風之重寄往祇朕命益勵乃心

李珪永祐陵殯宮復按副使階官遙郡上各轉

一官制

勅朕愴念祐陵克備送終之禮近瞻東越爰興卜宅之  
工抨圖雖屬於攸司復按實資於邇列往介使事尤資  
信臣逮茲第賞之初宜厚錄勞之報具官某秉心忠恪  
履位靖共帥屬宮庭善多儀於可則在公夙夜堅一節  
而不渝屬屈因山之期有嘉陟嶽之役見知則說錫命  
惟新陞橫列以增華陟兵團之重寄往祗殊渥益勵乃

心

玉輅黃麾仗成內侍邵鄂轉一官制

勅上詞

嘉乃底績賴予信臣具官某性極疏明智無

凝滯遇事輒得要領承命不忘恪恭眷茲技巧之精允  
藉賢勞之助雖一器而工聚誠不易為然百度之鼎新  
孰云小補其增崇於使範以申勸於事功祇我恩休毋  
忘夙夜

右承事郎直祕閣劉堯佐右承奉郎直祕閣劉

堯仁等並轉一官制

勅具官某等朕眷遇勲舊超越等夷恩數所加不間存歿今光世之逝深慨予懷錄其家人子弟中外姻黨者所以昭不忘也爾等是宜抑畏小心懷忠自奮往祇朕訓無愧前人

武翼大夫宋肇知揚州轉一官制

勅具官某間者宿兵淮壖申嚴守備以爾適總兵於東路嘗攝治於帥藩干城之勞宜有褒賞增秩一等往務



欽承

呂希常奉使有勞轉一官制

勅具官某四牡勞使臣之詩也其首章曰四牡騤騤周道倭遲又曰王事靡盬不遑啓處夫人君用人有功而見知此臣下所以說而忘勞也爾比以郎曹出將使指聞命引道匱薄良勤宜膺增秩之華以厚言歸之寵往服朕命毋怠欽承

知池州陳桷特轉一官制

勅王者孝格神明宜召非常之慶人臣義均休戚爰輸  
享上之誠可無恩章以示褒勸具官某輟自甘泉之列  
出分南國之符治郡有方已屢聞於報政身雖處外常  
不替於愛君屬皇家修舉於盛儀慮國計或資於調度  
能以支郡率先衆人何愛一官亦示長才之有賞夷考  
平日則知善政之得民

武功大夫榮州防禦使樞密院諸房副承旨安  
世賢階官上轉行一官制

勅惟右銓橫列之始實國朝上閣之聯匪有殊勞未嘗  
輕授具官某充職樞府屢閱歲時錄其夙夜之勤宜有  
嘉褒之典就陞厥次仍服故官往務欽承益思報稱

史德趙萬等橫行遙郡上各轉行一官制

勅奮身不顧將士所以效忠定功有差人主所以行賞  
具官某等驚勇絕衆趨猛馳聲陷陣摧鋒所向莫敵比  
預淮壖之戰有嘉斬獲之多用頒信賞之優俾任廉車  
之重益思懋勉以稱所蒙

右承事郎知淳安縣孔括轉一官再任制

勅具官某漢制郎官出宰百里蓋重近民之官也當是時非獨上重其選而為吏者亦能以治行自見班班可紀朕甚嘉之今爾令於淳安邑之士民疏爾善狀聞於朝廷亦庶幾乎朕嘗下其章俾部使者廉之言果不妄其頒增秩之恩且申久任之令風勸四方當自爾始尚勉之哉

應辦中官冊寶林又孫傳蘇籀施德脩劉才邵

錢時敏宋貺各轉一官制

勅具官杲等朕申講彌文交修盛典資爾羣工之助渙  
然百度之新爾等夙夜在公敏彊舉職善提綱而振領  
致樂事以勸功嘉乃賢勞用增厥秩往服休命益懋爾  
為

度支郎官李椿年救火轉一官制

勅具官某間者居民昧徙薪之計焚如遺患公私病之  
火道所表爾謹其防官酤之儲卒善調護昔樂喜為善

政預戒百官各庀其守今汝官長以汝為言亦可謂能  
庀其守者矣事不避難於汝有焉寵進一官庸示褒勸

寄班祗候邵璿轉一官制

勅具官某中侍之臣以廉靖寡過至於董率其屬參古  
者內小宰之職而又賞延於世祖宗親以勸之之意深  
固將責其盡忠以事上也以爾璿是似可嘉陟官一等  
既申彛則并示恩休往服贊書益茂爾祉

劉福等轉官制

勅具官某爾等頃由蜀道入扈禁嚴道途阻修匱薄良苦咸增厥秩往務欽承

提舉浙東茶鹽王鈇賞轉一官制

勅具官某昔劉晏稱善理財然歲入之數權鹽居其太半朕以是知煮海之利有助於公家也溥矣爾以疏通之材出使浙東盜販禁戢舟車流行會課歲終遂溢常額奉法如此可不謂之稱乎其增一官以示褒勸

提舉浙西茶鹽徐康賞轉一官制

勅具官某

上詞同

爾頃者以疏通之材將命浙西明阜通

之方嚴盜販之禁歲終會課以增羨聞亦可謂善於其職者矣陞秩一等庸示褒勸

秉義郎程彥忠翌郎安義並贈兩官各與兩資

### 恩澤制

勅具官某等士以忠勇捐軀行陳閱歲滋久可緩恩章爾等頃在涇原立功甚雋未沾信賞朕豈汝忘用增厥官并恤其後營蒐不昧尚克歆承



程克俊除翰林學士知制誥制

勅禁林之地邃嚴密承顧問學士之職清峻專取文章  
必求天下之英髦以重詞臣之極選具官某性資敏悟  
術業精深早登甲科薦歷華貫賈君房言語之妙見重  
一時蘇廷碩制誥之優咸稱大筆惟學問有功於自得故  
翰墨應用而不窮比由東省之聯進預北門之直書詔  
填委占咎輒工屬邦家方厚於鄰盟凡典冊動關於國  
體雖潤色皆歸汝手然曲折必當予心誰謂才難尚茲

虛位之久爾既試可豈待滿歲而真往祇申命之榮益  
勵為儒之効

韋淵落致仕與在京宮觀制

勅垂車而稱耆老實哲人知止之規闔門而圖便安豈  
大臣盡忠之誼眷乃元舅休於明時念旅力之未愆屬  
丹衷之可倚肆頒命綽用協師言具官某敦厚近仁溫  
恭植德位彌高而深存抑損之戒福愈盛而不忘滿溢  
之憂務夙夜以在公期動容而中禮鳴玉曳組雅推肺

腑之良胙土分茆超冠蟬貂之貴比上言歸之惓勉施  
從欲之恩顧閱日之尚新諒愛君之未替起奉朝請申  
慰予懷仍陪真館之游式壯大廷之列噫昏定晨省朕  
方啓長樂之歡內睦外嫻誰復如渭陽之懿往祇異數  
益究令名

中亮大夫康州防禦使程俊母邵氏特封恭人  
制

勅朕展采神祇均釐臣庶惟事君既盡其節則渙寵斯

及其親具官母某氏禮法奉身柔嘉作則積善之慶有  
息而賢比乖隔於封陞蓋備嘗於險阻豈其忠義之感  
遂致母子如初屬熙事之告成宜湛恩之下逮申錫懿  
號增賁私庭服我寵榮益綏壽祉

左迪功郎孫朝隱母宋氏年九十一特封太孺  
人制

勅具官某母某氏朕尊禮高年教民為孝爾為人母以  
壽得封錫命惟新用覃風化

保義郎呂定母吳氏年九十二特封太孺人制  
勅具官某母某氏朕推崇孝治賚及期頤爾仕於朝而  
有壽母肆加封號風示萬方

開州文學李由直母任氏年九十六封太孺人  
制

勅具官某母某氏間者宗祀禮成霈澤四海期頤之人  
亦霑慶賚矧爾有子齒於仕版錫以封號用昭恩榮

左奉議郎守祕書省著作郎王揚英祖母朱氏

特贈孺人制

勅國家封贈之典以爵為差雖吾侍從之臣恩不及於再世而爾孫以妻之封號請貤於汝豈常制哉朕方以孝治天下嘉爾年甫期頤而終及見其孫登科從事亦人間之鮮儷者也今揚英為吾太史風動四方自儒者始朕故畧格令以旌汝於汝亦可謂榮矣營魂不昧尚其歆承

右迪功郎馮經母年一百四歲封太孺人制

勅具官某母某氏朕惟宗祀禮成故敷霈澤嘉爾百年之老適霑一時之恩肆頒絲綸益介壽祉

皇后姨張氏封孺人制

勅具官某氏禮降宮掖澤被私門爾以懿親宜同其慶寵加封號用侈國恩

宮正韓氏封才人制

勅坤儀正則天下治位冠六宮婦職修則家道齊禮嚴諸御爰卜吉日肇登長秋眷時柔良實勤贊輔宜頒褒

綽以示異恩具官某氏婉孌凝姿齊莊秉則若玉在璞  
中韞粹溫之珍如蘭有香靜懷服媚之德早膺遴選擢  
在邇聯翬茲盛典之行賴爾小心之助是用躡陞華綴  
密侍中宸崇秩視於列卿令名參於碩媛往祇渥渥毋  
怠欽承

劉堯佐堯仁孫正平並除直祕閣制

勅具官某等延閣寓直號稱華資以待賢能朕所購用  
惟勲臣有功於社稷或垂老以寵其子孫爾先世勤勞



王家位至公保奉身而退雅高知止之風力疾造朝尤  
見盡恭之義嘉爾有後並錫榮名汝堯佐等宜忠恪以  
自持益操修而罔怠克祇朕命毋墜家聲

知秀州方滋除直祕閣制

勅三館登賢無非盛選一時寓直是謂寵褒爾夙負通  
材能濟劇務與我共理惟爾之能比大集於舟師頗宣  
勞於匠事其下璽書之渥俾從藏室之游毋墜能聲嗣  
膺明陟

郝漸除直祕閣制

勅具官某朕比遣樞輔案行營屯戒邊吏以守為功致  
人兵不戰而屈解嚴江滸歸覲闕庭以爾早有能名曾  
參軍議念周旋之甚久行裨贊之云多載疇爾勞用頒  
茂典俾寓直於中祕以往參於俊游茲為異恩勿忘忠  
報

知潼州府趙子厚除直祕閣制

勅具官某朕惟爵賞之行本以礪世名器之重不可假

人矧延閣之華資實公朝之遴選授受之際必惟其人  
以爾擢秀宗枝登名桂籍早膺任使綽有能稱頃持將  
漕之權深曉裕民之計海易潼川之寄藹聞循吏之聲  
不有褒嘉孰為旌勸其頒寓直之寵以厚承流之休往  
懋爾為式圖報効

李鞬除直秘閣制

勅具官某朕購用名器未嘗假人延閣華資實處英俊  
以爾老於文學見推士林比繇大匠之聯出按七閩之

部寓直之寵式光其行往祇渙恩母忘報稱

